

T 2511  
8243

CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
SEP 1 1938

サロメ

列傳第五十四

通志二百四十一

梁

孔休源

裴子野

劉孝綽

子諒

孝勝弟

孝綽弟

潛弟

孝勝

孝威弟

孝先

孝綽從弟

孺

孺弟

覽

賢弟

遵

劉峻

兄孝慶

劉沼

何遜

劉顯

從弟

劉之遴

子三連

弟之亨

明山賓

弟少遐

張充

從叔

環子率

褚翔

族父球

宗夬



袁昂 馬仙理 昂子君正

庾纂 子喬 喬子曼

庾於陵 弟肩吾

蔡搏

江禧 弟曇 曇弟祿

周捨

王僧孺

謝朓 子護 護弟諫 諫子哲 朓弟子覽

覽弟舉 舉子喬 舉兄子僑

謝幾卿

謝微

陸倕 從子襄 襄兄子雲公

到沆 從弟澹 澹子鏡 澹弟洽

蕭琛

陸果 子單

庾仲容

蕭眎素 從弟洽 洽弟介

臧嚴 從叔未 未 有 角 弟 厲

徐君疇

孔休源字慶緒會稽山陰人晉尚書沖之八世孫沖即開府儀同三司愉之世父也曾祖遙之宋尚書水部郎父佩齊通直郎廬陵王府記室休源年十一而孤居喪盡禮每見父手所寫書必哀慟流涕不能自勝見者莫不為之垂泣後就吳興沈麟士受經畧通大義州舉秀才太尉徐孝嗣省其策深善之謂同坐曰董仲舒華令思何以尚此可謂後生之準的也觀其此對足稱王佐之才琅邪王融雅相友善乃薦之於司徒竟陵王以為西

通志列傳第五十四  
郎學士梁臺建與南陽劉之遴同爲太學博士當時以  
爲美選休源初到都寓於宗人少府孔登宅曾以祠事  
入廟中侍中范雲一與相遇深加褒賞曰不期忽覩清  
顏頓祛鄙吝觀天披霧驗之今日後雲命駕到少府門  
登便拂席整帶謂當詣已備水陸之品雲駐筓命休源  
及至命取其常膳正有赤倉米飯蒸鮑魚雲食休源食  
不舉主人之饌高談盡日同載還家登深以爲愧尚書  
令沈約當朝貴顯軒蓋盈門休源或時後來必虛襟引  
接處之坐右商畧文義其爲通人所推如此武帝嘗問

吏部尚書徐勉曰今帝業初基須一人有學藝解朝儀  
者爲尚書儀曹郎誰堪其選勉曰孔休源識見清通詳  
練故實自晉宋起居注誦畧上口帝亦素聞之即日除  
兼尚書儀曹郎是時多所改作每逮訪前事休源即以  
所誦記隨機斷決曾無凝滯吏部郎任昉謂之爲孔獨  
誦遷建康獄正平反辯析時罕寃人後有選人爲獄司  
者帝嘗引休源以勵之除中書舍人後爲尚書左丞彈  
肅禮闈雅允朝望時周捨撰禮疑義自漢魏至于齊梁  
並皆搜采休源所有奏議咸豫編錄再遷長兼御史中

承正色直繩無所回避百僚憚之後爲晉安王府長史  
南郡太守行荊州府州事武帝謂曰荊州總上流衝要  
義高分陝今以十歲兒委卿當善匡翼之勿憚周昌之  
舉也乃勅晉安王曰孔休源人倫儀表汝年尚幼當每  
事師之尋始興王憺代鎮荊州復以休源爲憺府長史  
太守行府事如故在州累政甚有政績平心決斷請託  
弗行帝深嘉之歷祕書監復爲晉安王府長史南蘭陵  
太守別勅專行南徐州事休源累佐名藩甚得人譽王  
深相倚仗軍民機務動必詢謀常於齋中別施一榻云

此是孔長史坐人莫得預焉其見敬如此歷都官尚書  
普通七年揚州刺史臨川王宏薨帝與羣臣議可代君  
州任者于時貴戚王公咸望遷授帝曰朕已得人孔休  
源才識明敏寔應此選乃授宣惠將軍監揚州事休源  
初爲臨川王行佐及王薨而管州任時論榮之神州都  
會簿領殷繁休源剖斷如流傍無私謁中大通二年加  
金紫光祿大夫在州畫決詞訟夜覽墳籍每車駕巡幸  
常以軍國事委之昭明太子薨有勅夜召休源入宴居  
殿與羣公參定謀議立晉安王綱爲皇太子自公卿珥

貂挿筆奏決於休源前休源怡然無愧時人名爲兼天  
子四年遇疾勅中使候問并給醫藥日有十數及卒遺  
令薄葬節朝薦蔬菲而已帝爲之流涕顧謝舉曰孔休  
源居職清忠方欲共匡政道奄至隕沒朕甚痛之舉曰  
此人清介彊直臣竊爲陛下惜之謚貞子休源風範彊  
正明練治體持身儉約學窮文藝當官理務不憚彊禦  
常以天下爲己任武帝深委仗之累居顯職纖毫無犯  
性慎密寡嗜好出入帷幄未嘗言禁中事世以此重之  
聚書盈七千卷手自校理凡奏議彈文勒成十五卷長

子雲童頗有父風位東揚州別駕少子宗範聰敏有識  
變位中書郎

裴子野字幾原河東聞喜人也曾祖松之宋光祿大夫  
祖駟南中郎外兵參軍父昭明齊通直散騎常侍各有  
傳子野生而母魏氏亡爲祖母殷氏所養殷柔明有文  
義以章句授之年九歲祖母亡泣血哀慟家人異之少  
好學善屬文起家齊武陵王國左常侍江夏王行參軍  
遭父憂去職初父寢疾彌年子野禱請備至涕泗霑濡  
父夜夢見其容曰召視如夢俄而疾間以爲至孝所感

命著孝感傳固辭乃止及居喪盡禮每之墓所哭泣處  
草爲之枯有白兔白鳩馴擾其側天監初尚書僕射范  
雲嘉其至行將表奏之會雲卒不果樂安任昉有盛名  
爲後進所慕遊其門者昉必推薦子野於昉爲從中表  
獨不至昉亦恨焉故不之善久之除右軍參軍兼廷尉  
正時三官通署獄子野嘗不在其同僚輒署其名奏有  
不允子野從坐免職或勸言請有司可無咎子野笑而  
答曰雖慙柳季之道豈因訟以受服自此免黜久之終  
無恨意時中書郎范縝與子野未遇聞其學行而善

焉會遷國子博士乃上表讓之有司以資歷非次不爲  
通後爲諸暨令在縣不行鞭罰人有爭訟者示之以理  
百姓稱悅合境無訟初子野曾祖松之宋元嘉中受詔  
續修何承天宋史未成而卒子野常欲繼成先業及齊  
永明末沈約所撰宋書稱松之已後無聞焉子野更刪  
撰爲宋畧二十卷其叙事評論多善而云戮淮南太守  
沈璞以其不從義師故也約懼徒跣謝之請兩釋焉約  
常歎其述作曰吾弗逮也蘭陵蕭琛言其評論可與過  
秦王命分路揚鑣於是吏部尚書徐勉言之於武帝以

為著作郎掌修國史及起居注項之兼中書通事舍人  
尋除通直著作舍人如故又勅掌中書詔誥是時西北  
徼外有白題及滑國遣使由岷山道入貢此二國歷世  
弗賓莫知所出子野曰漢潁陰侯斬胡白題將一人服  
虔注云白題胡名也又漢定遠侯擊虜入滑此其後乎  
時人服其博識勅仍使撰方國使圖廣述懷來之盛自  
要服至于海表凡二十國子野與沛國劉顯南陽劉之  
遴陳郡殷芸陳留阮孝緒吳郡顧協京兆韋稜皆博極  
羣書深相賞好顯尤推重之時長平侯蕭勳范陽張纘

每討論墳籍咸折衷於子野繼母曹氏亡居喪過禮服  
闋再遷貞外郎普通七年大舉北侵勅子野為後魏文  
受詔立成武帝以其事體大召尚書僕射徐勉太子詹  
事周捨鴻臚卿劉之遴中書侍郎朱异集壽光殿以觀  
之時並歎服帝目子野曰其形雖弱其文甚壯俄又勅  
為書喻魏相元义其夜受旨子野謂可待旦方奏未之  
為也及五鼓勅催令速上子野徐起操筆昧爽便就及  
奏帝深嘉焉自是凡諸符檄皆令具草子野為文典而  
速不尚麗靡其制作多法古與今文體異當時或有詆



訶者及其末翕然重之或問其爲文速者子野答云人  
皆成於手我獨成於心遷中書侍郎轉鴻臚卿領步兵  
校尉子野在禁省十餘年靜默自守未嘗有所請謁外  
家及中表貧乏所得公奉悉分給之無宅借官地二畝  
起茅屋數間妻子常苦飢寒唯以教誨爲本子姪祗畏  
若奉嚴君劉顯常以師道推高之末年深信釋氏持其  
教戒終身飯麥食蔬中大通二年卒時年六十二遺命  
務存儉約武帝悼惜爲之流涕贈散騎常侍謚貞子先  
是五等君及侍中以上乃有謚及子野特以人望見嘉

故賜謚焉先是子野自占死期不過戊戌歲是年自有  
移疾謂同官劉之亨曰吾其逝矣子野少時集註喪服  
續裴氏家傳各三卷抄合後漢事四十餘卷又勅撰衆  
僧傳二十卷百官九品二卷附益謚法一卷方國使圖  
一卷文集二十卷並行於世又勅撰齊梁春秋始草創  
未就而卒及葬湘東王爲之墓誌銘陳于藏內邵陵王  
又立墓誌埋于羨道羨道列誌自此始焉子騫官至通  
直郎

劉孝綽字孝綽彭城人也本名冉祖勔宋司空父繪武

帝霸府從事中郎繪附其兄太常俊傳列在齊史孝綽  
幼聰敏七歲能屬文舅齊中書郎王融深賞異之常與  
同載以適親友號曰神童融每言曰天下文章若無我  
當歸阿士阿士即孝綽小字也父繪齊世掌詔誥孝綽  
時年十四繪嘗使代草之父黨沈約任昉范雲等聞其  
名並命駕先造焉昉尤相賞好范雲年長繪十餘歲其  
子孝才與孝綽年並十四五及雲遇孝綽便申伯季乃  
命孝才拜之孝綽兼善草隸自以書似父乃變為別體  
天監初起家著作佐郎為歸沐詩贈任昉昉報曰彼美

洛陽子投我懷秋作詎慰老嗟人徒深老夫託真史兼  
褒貶轄司專疾惡九折多美疹匪報庶良藥其為名流  
所重如此俄以本官兼尚書水部郎奉啓陳謝手勅答  
曰美錦未可便製簿領亦宜稍習頃之即真武帝雅好  
雕蟲時因宴幸令沈約任昉等言志賦詩孝綽亦見引  
嘗侍宴於坐作詩七首帝覽其文篇篇嗟賞由是朝野  
改觀後除祕書丞帝謂舍人周捨曰第一官當知用第  
一人故以孝綽居此職累遷太子僕掌東宮管記時昭  
明太子好士愛文孝綽與陳郡殷芸吳郡陸倕琅邪王

筠彭城劉台等同見禮太子起樂賢堂乃使畫工先圖  
孝綽焉太子文章繁富羣才咸欲撰錄太子獨使孝綽  
集而序之遷貞外散騎常侍兼廷尉卿頃之即真初孝  
綽與到溉兄弟甚狎溉少孤宅近僧寺孝綽往溉許適  
見黃卧具孝綽謂僧物色也撫手笑溉知其旨奮拳擊  
之傷口而去又與洽同遊東宮孝綽自以才優於洽每  
於宴坐嗤鄙其文洽深銜之及孝綽為廷尉正攜妾入  
官府其母猶停私宅洽尋為御史中丞遣令史案其事  
遂劾奏之云攜少妹於華省棄老母於下宅武帝為隱

其惡改妹為姝字孝綽坐免官孝綽諸弟時隨藩在  
荆雍乃與書論其洽不平者十事其辭皆鄙到氏又寫  
別本封至東宮昭明太子命焚之不開視也孝綽免職  
後武帝數使僕射徐勉宣旨撫慰之每朝宴常預焉及  
武帝為籍田詩又使徐勉先示孝綽時奉詔作者數十  
人帝以孝綽詩工即日起為西中郎湘東王諮議參軍  
遷黃門侍郎尚書吏部郎坐受人絹一束為餉者所訟  
左遷信威臨賀王長史晚年忽忽不得志後為祕書監  
初孝綽居母憂冬月飲冷水因得冷癖以大同五年卒

官年五十九孝綽少有盛名而杖氣負才多所陵忽有  
不合意者必極言詆訾領軍臧盾太府卿沈僧粲等並  
被時遇孝綽尤輕之每於朝集會同處公卿間無所與  
語唯呼騶卒訪道塗間事由此多忤於物前後凡五免  
孝綽辭藻爲後進所宗時重其文每作一篇朝成暮徧  
好事者咸傳寫流聞河朔亭苑柱壁莫不題之文集數  
十萬言行於世孝綽兄弟及羣從子姪當時有七十人  
並能屬文近古未之有也其三妹一適琅邪王叔英一  
適吳郡張嶷一適東海徐悌並有才學悌妻文右清拔

所謂劉三娘者也悌僕射勉之子爲晉安郡卒喪還京  
師妻爲祭文辭甚悽愴勉本欲爲哀辭旣覩之乃閣筆  
孝綽子諒字永信小名春少好學有文才尤博悉晉氏  
故事時人號曰皮裏晉書位中軍宣城王託室爲湘東  
王所善王嘗游江濱歎秋望之美諒對曰今日可謂帝  
子降於北渚王有目疾以爲刺已應曰卿言目眇眇以  
愁予邪從此嫌之孝綽弟潛字孝儀幼孤與諸兄弟相  
勗以學並工屬文孝綽嘗云三筆六詩三即孝儀六謂  
孝威也天監五年舉秀才累選尚書殿中郎勅令製雍

州平等寺金像碑文甚宏麗晉安王綱鎮襄陽引為安  
北功曹史及王為皇太子仍補洗馬遷中舍人出為陽  
羨令甚有稱績後為中書郎以公事左遷安西諮議參  
軍兼散騎常侍使魏還除中書郎累遷尚書左丞長兼  
御史中丞在職多所彈糾無所顧望當時稱之出為臨  
海太守時政網踈闕百姓多不遵禁孝儀下車宣下條  
制勸精綏撫境內翕然風俗大變入遷都官尚書大清  
元年出為豫州刺史侯景寇建鄴孝儀遣子勵帥郡兵  
三千隨前衡州刺史韋粲入援及宮城不守孝儀為前

歷陽太守莊鐵所逼失郡卒孝儀為人寬厚內行尤篤  
第二兄孝熊早卒孝儀奉寡嫂甚謹家內巨細必先諮  
決與妻子朝夕供事未嘗失禮時人以此稱之有文集  
二十卷行於世第五弟孝勝位尚書右丞兼散騎常侍  
聘魏還為安西武陵王紀長史蜀郡太守紀僭號於蜀  
以為尚書僕射隨紀出峽口兵罷被執元帝宥之以為  
司徒右長史第六弟孝威氣調爽逸風儀俊舉初為安  
北晉安王法曹後為太子洗馬中舍人庶子率更令並  
掌管記大同中白雀集東宮孝威上頌甚美太清中遷

中庶子兼通事舍人及侯景寇亂隨司州刺史柳仲禮  
至安陸卒第七弟孝先位武陵王主簿與兄孝勝俱隨  
紀軍出峽口兵敗元帝以為黃門郎遷侍中孝綽從弟  
孺字孝稚世父悛子也孺幼聰敏七歲能屬文年十四居  
喪毀瘠骨立宗黨咸異之叔父瑱為義興郡攜以之官  
嘗置坐側謂賓客曰此吾家明珠也及長美風采性通  
和雖家人不見其喜愠本州召迎主簿起家中軍法曹  
行參軍時鎮軍沈約聞其名引為主簿恒與游宴賦詩  
大為約所嗟賞累遷太子中舍人孺少好文章性又敏

速嘗在御坐為李賦受詔便成文不加點武帝甚稱賞  
之後侍宴壽光殿詔羣臣賦詩時孺與張率並醉木及  
成帝取孺手版題戲之曰張率東南美劉孺洛陽才  
筆便應就何事又遲回其見親愛如此遷中書郎兼中  
書通事舍人歷太子中庶子尚書吏部郎累遷散騎常  
侍左戶尚書大同五年守吏部尚書出為晉陵太守在  
郡和理為吏民所稱入為侍中後復為吏部尚書母憂  
以毀卒謚曰孝子孺少與從兄苞孝綽齊名苞早卒孝  
綽數坐免黜位並不高唯孺貴顯有文集二十卷孺弟

覽字孝智年十六精通老易位中書郎以所生母憂廬  
墓嘗再暮不嘗鹽酪食麥粥而已隆冬止著單布衣  
家人慮不勝喪中夜竊置炭於牀下覽因暖得寐及覺  
知之號慟歐血武帝聞其至性數使省視服闋除尚書  
左丞性聰敏尚書令史七百人一見並記名姓當官清  
正無所私孝綽為吏部郎在職頗通臧貨覽劾奏免官  
孝綽怨之常謂人曰犬噬行路覽噬家人出為始輿內  
史居郡尤勵清節復為左丞卒官覽弟遵字孝陵有學  
行工屬文為晉安王綱宣惠雲麾二府記室甚見賓禮

王立為太子洗除中庶子遵自隨蕃及在東宮以舊恩  
偏蒙寵遇時輩莫及卒官皇太子深悼惜之與遵從兄  
陽羨令孝儀令曰賢從弟中庶奄至殞逝痛可言乎其  
孝友淳深立身貞固内含玉潤外表瀾清言行相符終  
始如一文史該富琬琰為心辭章博贍玄黃成采既以  
鳴謙表性又以難進自居吾昔在漢南連翩書記及忝  
朱方從容坐首鷁舟乍動朱鷺徐鳴未嘗一日而不追  
隨一時而不會遇益者三友此實其人及弘道下邑未  
申善政而能使人結去思野多馴翟此亦威鳳一羽足

以驗其五德其見愛賞如此遵從弟苞字孝嘗一字孟  
嘗父愼悛之弟也位太子中庶子苞三歲而孤至六七  
歲見諸父常泣時伯父悛繪等並顯貴其母謂其畏憚  
怒之苞曰早孤不及有識聞諸父多相似故心中悲耳  
因而歔歔母亦悲慟初苞父母及兩兄相繼亡悉假瘞  
焉苞年十六始移墓所經營改葬不資諸父奉嫡母朱  
夫人及所生陳氏並扇席溫枕叔父繪常歎伏之少好  
學能屬文家有舊書例皆殘蠹手自編輯筐篋盈滿梁  
初以臨川王妃弟故自征虜主簿遷右軍功曹累遷太  
子洗馬掌書託侍講壽安殿及從兄孝綽等並以文藻  
見知多預宴坐受詔詠天泉池荷及採菱調下筆即成  
天監十年卒臨終呼友人南陽劉之遴託以喪事從儉  
苞居官有能名性和直與人交面折其非退稱其美士  
友咸以此歎惜之

劉峻字孝標本名法武其先平原人祖昶從慕容德入  
齊因家于北海父璇之宋始興內史從父兄懷珍字齊  
世知名位終光祿大夫自有傳峻生朞月而璇之卒其  
母許氏攜峻及其兄法鳳還歸鄉里宋泰始初青州陷



魏峻年八歲爲人所畧爲奴至中山中山富人劉寶慈峻以束帛贖之教以書學魏人聞其江南有戚屬更徙之桑乾峻居貧不能自立與母並出家爲尼僧旣而還俗峻好學家貧寄人廡下自課讀書常燎麻炬從夕達旦時或昏睡熱其髭髮旣覺復讀終夜不寐其精力如此時魏孝文遴選物望河南人士才學之徒咸見申擢峻兄弟不蒙選授齊永明中俱奔江南更改名峻字孝標自以少時未開悟晚更厲精明慧過人苦所見不博聞有異書必徃祈借清河崔慰祖謂之書淫於是博極

言又藻秀出故其自序云巽中濟濟皆升堂亦有愚者解衣裳言其少年魯鈍也時竟陵王子良招學士峻因人求爲子良國職吏部尚書徐孝嗣抑而不許因爲南海王侍郎不就至齊明帝時蕭遙欣爲豫州引爲府刑獄參軍禮遇甚厚遙欣尋卒久不調天監初召入西省與學士賀蹤典校祕閣峻兄孝慶時爲青州刺史峻請假省之坐私載禁物爲有司所奏免官安成王秀雅重峻及安成王遷荊州引爲戶曹參軍給其書籍使抄錄事類名曰類苑未及就復以疾去職因遊東陽紫巖

山築室居焉為山栖志其文甚美初武帝招文學之士  
有高才者多被引進擢以不次峻率性而動不能隨衆  
沉浮武帝每集文士策經史事時范雲沈約之徒皆引  
短推長帝乃悅加其賞賚魯策錦被事咸言已罄帝試  
呼問峻峻時貧悴冗散忽請紙筆疏十餘事坐客皆驚  
帝不覺失色自是惡之不復引見及峻類苑成凡一百  
二十卷帝即命諸學士撰華林徧畧以高之峻竟不見  
用乃著辯命論以寄其懷論成中山劉沼致書以難之  
凡再反峻泣為申析以荅之會沼卒不見峻後報者峻

乃為書以序其事其文論並多不載峻又嘗為自序其  
畧云余自比馮敬通而有同之者三異之者四何則敬  
通雄才冠世志剛金石余雖不及之而節亮慷慨此一  
同也敬通逢中興明君而終不試用余逢命世英主亦  
擯斥當年此二同也敬通有忌妻至於身操并曰余有  
悍室亦令家道輾軻此三同也敬通當更始世手握兵  
符躍馬肉食余自少訖長戚戚無權此一異也敬通有  
子仲文官成名立余禍同伯道永無血胤此二異也敬  
通旅力剛彊老而益壯余有犬馬之疾溘死無時此三

通志列傳五十四 卷七  
異也敬通雖芝殘蕙焚終填溝壑而為名賢所慕其風  
流郁烈芬芳久而彌盛余聲塵寂莫世不吾知還魄一  
去將同秋草此四異也所以力自為序遺之好事云峻  
本將門兄法鳳自北歸改名孝慶字仲昌早有幹畧齊  
末為兗州刺史舉兵應武帝封餘干男陞官顯重峻獨  
篤志好學居東陽吳會士人多從其學普通三年卒年  
六十門人謚曰玄靖先生劉沼字明信中山魏昌人六  
世祖輿晉驃騎將軍沼幼善屬文及長博學位終秣陵  
令峻從孫杳字士深父懷慰齊世為齊郡太守附載懷

珍傳中杳年數歲徵士明僧紹見之撫而言曰此兒寔  
千里之駒十三丁父憂哀感行路天監中為宣惠豫章  
王行參軍杳博綜羣書沈約任昉以下每有遺忘皆訪  
問焉嘗於約坐語及宗廟犧樽約云鄭玄答張逸謂為  
畫鳳凰尾婆娑然今無復此器有則不依古杳曰此言  
未必可安古者樽彝皆刻木為鳥獸形鑿頂及背以出  
內酒魏世魯郡地中得齊大夫子尾送女器有犧樽作  
犧牛形又晉永嘉中賊曹疑於青州發齊景公冢又得  
二樽形亦為牛象二處皆古之遺器知非虛也約大以

通志列傳卷四 十八  
為然約又云何承天纂文竒博其書載張仲師及長頸  
王事此何所出杳曰仲師長尺二寸唯出論衡長頸是  
毗騫王朱建安扶南以南記云古來至今不死約即取  
二書尋檢一如杳言約郊居宅時新構閣齋杳遂為贊  
二首并以所撰文章呈約約即命工書人題其贊于壁  
仍報杳書共歎美之又任昉坐有人餉昉搖酒而作  
撰字昉問杳此字是否杳對曰葛洪字苑作木旁若昉  
又曰酒有千日醉當是虛言杳云桂陽程鄉有千里酒  
飲之至家而醉亦其例也昉大驚曰吾自當遺志寔不

憶此杳云楊元鳳所撰置郡事元鳳是魏代人此書仍  
載其賦云三重五品商溪捺里昉即檢揚記言皆不差  
王僧孺被勅撰譜訪杳血脉所因杳云桓譚新論云太  
史公三代世表旁行邪上並效周譜以此而推當起周  
代僧孺歎曰可謂得所未聞周捨又問杳尚書官著紫  
荷橐相傳云挈囊竟何所出杳荅曰張安世傳云持橐  
簪筆事孝武皇帝數十年韋昭張晏注並云橐囊也近  
臣簪筆以待顧問范岫撰字書音訓又訪杳焉尋佐周  
捨撰國史出為臨津令有善績秩滿縣三百人詣闕請

留勅許焉後除晉安王府參軍詹事徐勉舉杳及顧協等五人入華林撰徧畧書成以本官兼廷尉正以足疾解職因著林庭賦王僧孺見而歎曰郊居以後無復此作累遷尚書儀曹郎僕射徐勉以臺閣文議專委杳焉出爲餘姚令在縣清潔湘東王繹發教褒美之大通元年爲步兵校尉兼東宮通事舍人昭明太子謂杳曰酒非卿所好而爲酒府之職政爲卿不愧古人耳太子有瓠食器因以賜焉曰卿有古人之風故遺卿古人之器俄有勅代裴子野知著作郎事昭明太子薨新宮建舊

人例無停者勅特留杳焉僕射何敬容奏轉杳王府諮議武帝曰劉杳須先經中書仍除中書侍郎尋爲平西湘東王諮議參軍兼舍人著作如故遷尚書左丞大同二年卒年五十杳治身清儉無所嗜好不自伐不論人短長及覩釋氏經常行慈忍居母憂後便長斷腥羶持齋蔬食及臨終遺命歛以法服載以露車還葬舊墓隨得一地容棺而已不得設靈筵及祭輟其子遵而行之撰要雅五卷楚辭草木疏一卷高士傳二卷東宮新舊記三十卷古今四部書目五卷文集十五卷並行於世

杏與兄霽弟歆俱知名霽有至性列在孝友傳歆不娶  
不仕隱居求志在隱逸傳

何遜字仲言東海郊人也曾祖承天宋御史中丞自有  
傳父洵齊太尉中兵參軍遜八歲能賦詩弱冠州舉秀  
才南郡范雲見其對策大相稱賞因結志年交自是一  
文一詠雲輒嗟賞謂所親曰頃觀文人質則過儒麗則  
傷俗其能含清濁中今古見之何生矣沈約亦愛其文  
嘗謂遜曰吾每讀卿詩一日三復猶不能已其為名流  
所稱如此天監中起家奉朝請除安成王記室王愛之

隨府江州還兼尚書水部郎南平王復引為賓客掌記  
室事後薦之武帝與吳均俱進倖後稍失意帝曰吳均  
不均何遜不遜若吾有朱異信則異矣自是踈隔希復  
得見卒於仁威廬陵王記室初遜為南平王所知深被  
恩禮及聞遜卒命迎其柩而殯藏焉并錄其妻子東海  
王僧孺集其文為八卷初遜文章與劉孝綽並見重於  
世謂之何劉元帝著論論之云詩多而能者沈約少而  
能者謝朓何遜遜從叔憺字彥夷亦以文才著聞宦遊  
不達作拍張賦以喻意末曰東方曼倩發憤於侏儒遂

與火頭食子稟賜不殊位至臺郎時有會稽虞騫工爲  
五言名與遜相埒官至王國侍郎後又有會稽孔翁歸  
濟陽江避並爲南平王大司馬府記室翁歸工爲詩避  
博學有思理注論語孝經二人並有文集

劉顯字嗣芳沛國相人也父驎字仲翔博識彊正以名  
行自居幼爲外祖臧質所鞠養質既富盛恒有音樂質  
亡後母没十許年驎每聞絲竹之聲未嘗不歎歎流涕  
天監初終於晉安內史顯幼而聰敏六歲能誦呂相絕  
秦賈誼過秦琅邪王思遠吳國張融見而稱賞號曰神

童族父瓛儒學有重名官至尚書左丞齊史有傳瓛卒  
無嗣齊武帝詔顯爲後時年十八歲本名頰齊武以字  
難識改名顯天監初舉秀才解褐中軍臨川王行參軍  
俄署法曹顯好學博涉多通任昉嘗得一篇缺簡文字  
零落莫能識者顯云是古文尚書所刪逸篇昉檢周書  
果如其說昉因大相賞異丁母憂服闋尚書令沈約時  
領太子少傅引爲少傅五官約爲丹楊尹嘗命駕造焉  
於坐策顯經史十事顯對其九約曰老夫昏忘不可受  
策雖然聊試數事不可至十顯問其五約對其二陸倕

聞之擊席喜曰劉郎可謂善人雖吾家平原詣張壯武  
王粲謁蔡伯喈必無此對其為名流推賞如此五兵尚  
書傳昭掌著作撰國史顯白兼廷尉正被引為佐及革  
選尚書五都顯以本官兼吏部郎遷儀曹郎嘗為上朝  
詩沈約見而美之時郊居宅新成因命工書人題之於  
壁後兼中書通事舍人再遷驃騎鄱陽王記室兼中書  
舍人後為中書郎舍人如故顯與江東裴子野南陽劉  
之遴吳郡顧恊連職禁中逆相師友時人莫不慕之顯  
博聞彊識過於裴顧時波斯國獻生師子帝問曰師子

有何色顯曰黃師子超不及白師子超魏人獻古器有  
隱起字莫能識者顯案文讀之無有滯礙考校年月一  
字不差武帝甚嘉焉遷尚書左丞除國子博士時有沙  
門訟田帝大署曰貞有司未辯偏問莫知顯曰貞字文  
為與上人帝因忌其能出之後為雲麾邵陵王長史尋  
陽太守魏使李諧至聞之恨不相識歎曰梁德衰矣善  
人國之紀也而出之無乃不可乎王遷鎮郢州除平西  
府諮議參軍又在府不得志大同九年終於夏口時年  
六十三凡佐兩府並事驕王人為之憂而反見禮重友



人劉之遴啓皇太子曰嘗聞夷叔柳惠不逢仲尼一言則西山餓夫東國黜士名豈施於後世不朽之事寄之題目顯今卜宅有日須鐫墓板畧撰其事行今輒上呈太子乃爲之製銘誌葬於秣陵縣劉真長舊學字業爲雋臻臻早有名列在隋文苑傳顯從弟穀字仲寶形貌短少儒雅博洽善辭翰隨湘東王在蕃十餘年寵寄甚深當時文檄皆其所爲位吏部尚書國子祭酒魏剋江陵入長安

劉之遴字思貞南陽涅陽人也父虬高尚不仕列在齊隱逸傳之遴八歲能屬文虬曰此兒必以文興吾宗堂謂諸子曰若比之顏氏之遴得吾之文由是州里稱之時有沙門僧惠有異識每詣虬必呼之遴小字曰僧迦福德兒握手而進之年十五舉茂才明經對策沈約任昉見而異之吏部尚書王瞻嘗候任昉值之遴在坐昉謂瞻曰此南陽劉之遴學優未仕水鏡所宜甄擢瞻即調爲太學博士昉曰爲之美談不如面試時張稷新除尚書僕射託昉爲讓表昉令之遴代作操筆立成昉曰荆南秀氣果有異才後仕必當過僕御史中丞樂藹即之

遊之舅憲臺奏彈皆令之遊草焉為荊州中從事簡文  
臨荊州仍遷宣惠記室之遊篤學明審博覽羣籍時劉  
顯韋稜並稱彊記之遊每與討論咸不過也累遷中書  
侍郎鴻臚卿出為南郡太守武帝謂曰卿母年德並高  
故令卿衣錦還鄉盡榮養之理轉西中郎湘東王繹長  
史太守如故初之遊在荊府常寄居南郡解忽夢前太  
守袁彖謂曰卿後當為折臂太守即居此中之遊後牛  
奔隨車折臂右手偏直不復得屈神書則以手就筆歎曰  
豈黥而王乎周捨嘗戲之曰雖復並坐可橫肱政恐陋

巷無枕後連相兩王再為此郡歷祕書監出為郢州行  
事之遊意不願出固辭曰去歲命絕離巽不敢東下今  
年所忌又在西方武帝手勅曰朕聞妻子具孝衰於親  
爵祿具忠衰於君卿既內足理忘奉公之節遂為有司  
奏免後為都官尚書之遊好古愛竒在荊州聚古器數  
十百種有一器似甌可容一斛上有金錯字時人無能  
知者又獻古器四種於東宮其第一種鏤銅鷓夷榼二  
枚兩耳有銀鏤銘云建平二年造其第二種金銀錯鏤  
古罇二枚有篆銘云秦容成侯適楚之歲造其第三種

外國澡灌一口有銘云元封二年龜茲國獻其第四種  
古製澡盤一枚銘云初平二年造時鄱陽嗣王範得班  
固所上漢書真本獻之東宮皇太子令之遴與張纘到  
漑陸襄等參校同異之遴錄其異狀數十事其大畧云  
案古本漢書稱永平十六年五月二十一日己酉郎班  
固上而今本無上書年月日子又案古文叙傳號為中  
篇今本稱為叙傳載班彪事行而古本云彪自有傳又  
今本紀及表志不相合為次而古本相合為次總成三  
十八卷又今本外戚在西域後古本外戚次帝紀下又

今本高五子文三王景十三王孝武六子宣元六王雜  
在諸傳矣中古本諸王悉次外戚下在陳項傳上又今本  
韓彭英盧吳述云信惟餓隸布實黥徒越亦狗盜芮尹  
江湖雲起龍驤化為侯王古本述云淮陰毅毅伏劍周  
章邦之傑子寔惟彭英仕為侯王雲起龍驤又古本第  
三十七卷解音釋義以助雅詁而今本無此卷也之遴  
好屬文多學古體與河東裴子野沛國劉顯恒共討論  
古籍因為交好時周易尚書禮記毛詩並有武帝義疏  
唯左氏傳尚闕之遴乃著春秋大意十科左氏一科三

傳同異十科合三十事上之帝大悅優詔褒焉始武帝  
於齊代為荆府諮議時之遴父虬隱在百里洲早相知  
聞帝偶匱乏遣就虬換穀百斛時之遴在父側曰蕭諮  
議躡士云何能得春願與其米虬從之及帝即位常懷  
之侯景初以蕭正德為帝之遴時落景所將使授璽紱  
之遴預知仍剃髮披法服乃免先是平昌伏挺出家之  
遴為詩嘲之曰傳聞伏不鬪化為支道林及之遴遇亂  
遂披染服時人笑之尋避難還鄉湘東王繹嘗嫉其才  
學聞其西上至夏口乃密送藥殺之不欲使人知乃自

製誌銘厚其賻贈前後文集五十卷子三達字三善數  
歲能清言及屬文州將湘東王繹聞之盛集賓客召而  
試之說義屬詩皆有理致年十二聽江陵令賀革講禮  
還仍覆述不遺一句年十八卒之遴深懷悼恨乃題墓  
曰梁妙士以旌之之遴弟之亨字嘉會年四歲出後叔  
父嵩及長好學美風姿善占對武帝之臨荆州唯與虬  
談虬見之遴之亨帝曰之遴必以文章顯之亨當以功  
名著後州舉秀才除太學博士仍代兄之遴為中書通  
事舍人累遷步兵校尉湘東王繹諮議參軍勅賜金策

并賜詩焉大通六年出師南鄭詔湘東王節度諸軍之  
身以司農卿為行臺承制途出本州北界總督眾軍杖  
節而西樓船戈甲甚盛老小緣岸觀曰是前舉秀才者  
鄉部偉之是行也大致克復軍士有功皆錄唯之身為  
蘭欽所訟執政因而陷之故封賞不行但復本位而已  
父之帝讀陳湯傳恨其立功絕域而為文吏所讒宦者  
張僧胤曰外間論者謂劉之身類之帝感悟乃封為臨  
江子固辭不拜之身美績嘉聲在朱昇之存既不協懼  
為所害故美出之以代之遊為安西湘東主繹長史

郡太守上問朱昇曰之身代兄喜不兄弟因循豈直大  
馮小馮而已又謂尚書令何敬容曰荊州長史南郡太  
守皆是僕射出入今者之身便是九轉在郡有異績吏  
民稱之卒官荆土懷之不復稱名號為大南郡小南郡子  
廣德亦好學負才任氣承聖中位湘東太守魏平荊州  
依于王琳琳平陳太建中歷河東太守卒官之身弟之  
達位荊州中從事史子仲威少有志氣頗涉文史承聖  
中為中書侍郎蕭莊稱尊號以為御史中丞隨莊終鄴  
中之遊從叔坦字德度仕齊歷尋陽陵令南中郎錄事參

軍所居以幹濟稱武帝起兵時輔國將軍楊公則爲湘  
州刺史帥師赴夏口西朝議行州事者坦求行仍除輔  
國長史長沙太守行湘州刺史坦嘗在湘州多舊恩道  
迎者甚衆齊東昏遣安成太守劉希祖破西臺所選太  
守范僧簡於平都希祖移檄湘部於是始興內史王僧  
粲應之湘部諸郡悉皆蜂起州人咸欲汎舟逃走坦悉  
聚船焚之前湘州鎮軍鍾玄紹潛應僧粲坦聞其謀僞  
爲不知因理訟至夜城門遂不閉以疑之玄紹未及發  
明旦詣坦問其故玄紹與語密遣親兵收其家玄紹立  
坐未起而收兵已報具得其文書本末玄紹即首伏  
坐斬之焚其文書餘黨悉無所問天監初論功封荔浦  
子三年遷西中郎長史蜀郡太守行益州事未至蜀道  
卒

明山賓字孝若平原鬲人也父僧紹高尚不仕列在隱  
逸傳山賓七歲能言名理十三博通經傳起家奉朝請  
兄仲璋痼疾家道屢空山賓乃行干祿後爲廣陽令頃  
之去官會詔使公卿舉士左衛將軍江祐上書薦山賓  
才堪理劇齊明帝不重學謂祐曰聞山賓談書不輟何

堪官邪遂不用梁臺建遷右軍記室參軍掌古禮時初  
置五經博士山賓首膺其選歷中書侍郎國子博士太  
子率更令中庶子天監十五年出為持節都督緣淮諸  
軍事北兗州刺史普通二年徵為太子右衛率加給事  
中遷御史中丞以公事左遷黃門侍郎四年遷散騎常  
侍領青冀二州大中正東宮新置學士又以山賓居之  
俄以本官兼國子祭酒初山賓為州時所部平陸縣不  
稔啓出倉米以贍貧民後刺史檢州曹失簿書以山賓  
為耗損有司追責籍其宅入官山賓不自理更市也告

定昭明太子聞築室不就有令曰明祭酒雖出撫大  
擁旌推轂珥金拖紫而常事屢空聞構宇未成今送簿  
助并貽之詩曰平仲古稱奇夷齊昔擅美令則擬伊賢  
東秦固多士築室非道傍置宅歸仁里庚桑方有繼原  
生今易擬必來三逕人將招五經工山賓性篤實家中  
常乏困貨所乘牛既售受錢乃謂買主曰此牛經患漏  
蹄瘵差已久恐後脫發無容不相誥買主遽追取錢處  
士阮孝緒聞之歎曰此言足使還淳反朴激薄傳澆矣  
五年又以本官假節攝北兗州事後卒官贈侍中謚曰

質子山賓累居學官甚有訓導之益然性頗踈通接於諸生多狎比人皆愛之所著吉禮儀注一百二十四卷禮儀二十卷孝經喪服義十五卷子震字興道亦傳父業位太子舍人尚書祠部郎餘姚令山賓弟少遐字處默亦知名位都官尚書簡文謂人曰我不喜得尚書更喜朝廷得人後拜青州刺史太清之亂奔魏仕北齊卒於太子中庶子子罕司空記室明氏南渡雖晚並有名位自宋至梁爲刺史者六人

張充字延符吳郡吳人也祖演宋太子中舍人父階齊國子祭酒緒附載其叔父南充州刺史岱傳充好遊水緒嘗告歸至吳始入西郭逢充出獵右臂鷹左牽狗遇緒船至便放絀脫鞵拜於水次緒曰一身兩役無乃勞乎充跪曰充聞三十而立今充二十九矣請至來歲緒曰過而能改顏氏子有焉及明年便脩改多所該通充明老易能清言與從叔稷俱有令譽歷尚書殿中郎武陵王友時尚書令王儉當朝用事武帝皆取決焉儉方聚親賓充縠巾葛帔至便求酒言論放逸一坐盡傾及聞武帝欲以緒爲尚書僕射儉執不可充以爲恨因與



似書曰頃者路長霖霞韜晦涼暑未平想無虧攝充幸  
以漁釣之閑鎌採之暇時復引軸以自娛逍遙乎前史  
從橫萬古動默之路多端紛綸百年升降之塗不一故  
金剛水柔性之別也圓行方止器之異也善御性者不  
違金水之質善爲器者不易方圓之用充生平少長偶  
不以利欲干懷三十六年差得以棲貧自澹介然之志  
峭聳霜崖確乎之情峯橫海岸至如影纓天閣旣謝廊  
廟之華綴組雲臺終愧衣冠之秀寔由氣岸踈凝情塗  
猶隔獨師懷抱不見許於俗人孤秀神崖每遭回於在

世長羣魚鳥畢景松阿雖復玉沒於訪珪之辰持  
於搜芳之日汎濫於漁父之遊偃息於卜居之會如此  
而已充何識哉若夫驚巖罩日吐海逢天竦石崩尋分  
危落仞桂蘭綺靡叢雜於山幽松栢陰森相繚於澗側  
元卿於是乎不歸伯休亦以茲長往至於飛竿釣渚濯  
足滄洲獨浪煙霞高卧風月悠悠琴酒岫遠誰來灼灼  
文言空擬方寸不覺鬱然千里路隔江川每至西風何  
嘗不歎丈人歲路未彊學優而仕道佐蒼生功橫海望  
可謂德盛當時孤松獨秀者也而茂陵之彥望冠蓋而

長懷渭川之吐佇簪裾而竦歎得無惜乎充岷西百姓  
岱表一人蠶而衣耕而食不能事王侯覓知己造時人  
騁游說容與於屠博之間其懽甚矣然舉世皆謂充爲  
狂充亦何能與諸君道之哉是以披聞見掃心曾述平  
生論語默所可通夢交魂推襟送抱者唯文人而已闕  
廷憂阻書莫能因儻遇樵夫妄塵執事儉以爲脫畧弗  
之重也仍以書示緒緒杖之一百沈約見其書嘆曰充  
始爲之敗終爲之成久之爲司徒諮議參軍與琅邪王  
思遠同郡陸惠曉等並爲司徒竟陵王賓客累遷義興

太守爲政清淨吏民便之後爲侍中武帝兵至建鄴東  
昏遇殺百官集西鐘下召充充不至武帝霸府建以充  
爲大司馬諮議參軍天監初歷太常卿吏部尚書居選  
以平允稱再遷散騎常侍國子祭酒登堂講說皇太子  
已下皆至時王侯多在學執經以拜充朝服而立不敢  
當再遷尚書僕射出爲吳郡太守下車卹貧老延故舊  
莫不欣悅卒於吳郡謚曰穆子子最嗣充從叔瓌字祖  
逸宋征北將軍南兖州刺史永之子也仕宋累遷桂陽  
內史不欲先兄瑋處祿自免不拜後爲司徒右長史通

直散騎常侍驍騎將軍初瓌父永拒桂陽王休範於白  
下敗績阮佃夫等欲加罪齊高帝固申明之瓌由此感  
恩自結後遭父母喪還吳持服昇明元年劉秉有異圖  
弟遐爲吳郡潛相影響齊高帝密遣殿中將軍卞白龍  
令瓌取遐諸張世有豪氣瓌宅中常有父時舊部曲數  
百遐召瓌委以軍事瓌僞受命與叔恕領兵十八人入  
郡斬之郡內莫敢動事捷高帝以告左軍張冲冲曰瓌  
以百口一擲出手得盧矣卽受吳郡太守錫以嘉名封  
義城縣侯從弟融聞之與瓌書曰吳郡何晚何須下反

聞之嗟驚乃是阿兄郡人顧嵩陸閑並少年未知名瓌  
並引爲綱紀後並立名世以爲知人齊建元元年改封  
平都侯遷侍中與侍中沈文季俱在門下高帝常謂曰  
卿雖我臣我視卿不異曠蕤等文季每還直器物皆遷  
瓌止朝服而已時集書海兼門下東省實多清貧有不  
識瓌者常呼爲散騎出爲吳興太守瓌以既有國秩不  
取郡奉高帝勅上庫別藏其奉以表其清武帝即位爲  
寧蠻校尉雍州刺史加都督徵拜左戶尚書加右軍將  
軍還後安陸王綏臨雍州行部登蔓山有野老求乞綏

問何不事產業而行乞邪答曰張使君臨州理物百姓  
家得相保後人政嚴故至行乞紆由是深加嗟賞後拜  
太常自謂閑職輒歸家武帝曰卿輩未富貴謂人不與  
既富貴那復欲委去瓌曰陛下御臣等若養馬無事就  
閑既有事復牽來帝猶怒遂以為散騎常侍光祿大  
夫鬱林之廢朝臣列宮門參承明帝瓌託脚疾不至海  
陵立明帝疑外藩起兵以瓌鎮石頭督衆軍事瓌見朝  
廷多難遂常卧疾建武末屢啓求還吳見許居室豪富  
妓妾盈房或有譏其衰暮畜妓瓌曰我少好音律老而

方解平生嗜欲無復一存唯未能遣此耳明帝疾甚防  
疑大司馬王敬則授瓌正東將軍吳郡太守以為之備  
及敬則反瓌遣兵迎拒於松江聞敬則軍鼓聲一時散  
走瓌棄郡逃入間事平乃還郡有司奏免官削爵永元  
初為光祿大夫三年武帝起兵東昏假瓌節戍石頭尋  
棄城還宮天監元年拜給事中右光祿大夫以脚疾拜  
於家四年卒瓌有子十二人常云中應有好者子率知  
名率字士簡性寬雅十二能屬文常日限為詩一篇或  
數日不作則追補之猶進作賦頌至年十六向作二千

餘首有虞訥者見而誣之率乃一旦焚毀更爲詩示焉  
託云沈約訥便句句嗟稱無字不善率曰此吾作也訥  
慙而退時陸少玄家有父澄書萬餘卷率與少玄善遂  
通書籍盡讀其書齊建武三年舉秀才除太子舍人與  
同郡陸倕陸厥幼相友狎嘗同載詣左衛將軍沈約遇  
任昉在焉約謂昉曰此二子後進才秀皆南金也卿可  
識之由此與昉交天監中爲司徒謝朓掾直文德待詔  
省勅使抄乙部書又使撰古婦人事使工書人琅邪王  
琛吳郡范懷約等寫然後宮率取假東歸論者以爲傲

世率懼乃爲待詔賦奏之甚見稱賞手勅答曰相與工  
而不敏枚臯速而不工卿可謂兼二子於金馬矣又侍  
宴賦詩武帝別賜率詩曰東南有才子故能服官政余  
雖慙古昔得人斯爲盛率奏詩徃反六首後引見於玉  
衡殿謂曰卿東南物望朕宿昔所聞卿言宰相是何人  
不從天下不由地出卿名家竒才若復以禮律爲意便  
是其人祕書丞天下清官東南望曹未有爲之者今以  
相處爲卿定名譽尋以爲祕書丞掌集書詔策四年禊  
飲華光殿其日河南國獻赤龍駒能拜伏善舞詔率與

通志卷之四十四  
到漑周興嗣爲賦武帝以率及興嗣爲工其年父憂去  
職有父時妓數十人其善謳者有色貌邑子儀曹郎顧  
琬之從率求妓謳者不願遂爲尼嘗因齋會率宅琬之  
乃飛書言尼與率姦南司以事聞武帝惜其才寢其奏  
然猶致時論服闋久之不仕七年除中權建安王中記  
室參軍俄直壽光省脩丙丁部書抄累遷晉安王宣惠  
諮議參軍率在府十年恩禮甚篤後爲揚州別駕率雖  
歷居職務未嘗留心簿領及爲別駕奏車武帝覽牒問  
之並無對但答云事在牒中帝不悅後歷黃門侍郎出

爲新安太守丁所生母憂卒率嗜酒不事事於家務尤  
忘懷在新安遣家僮載米三千石還宅及至遂耗太半  
率問其故答曰雀鼠耗率笑而言曰壯哉雀鼠竟不研  
問自少屬文七畧及藝文志所載詩賦今亡其文者並  
補作之所著文衡十五卷文集四十卷行於世子良公  
率弟盾字士宣以謹重稱爲無錫令遇劫問劫何須劫  
以刀斫其頰盾曰咄咄不易餘無所言於是生資皆盡  
不以介懷爲湘東王記室出監富陽令廓然獨處無所  
用心身死之日家無遺財唯有文集并書千餘卷酒米

數甕而已環弟稷字公喬幼有孝性所生母劉無寵邁疾時稷年十一侍養衣不解帶每劇則累夜不寢及終毀瘠過於成人杖而後起見年輩幼童輒哽咽泣涑州里謂之純孝長兄瑋善彈箏稷以劉氏先執此伎聞瑋爲清調便悲感頓絕遂終身不聽之性踈率朗悟有才畧起家著作佐郎不拜父永及嫡母丘相繼歿逝六年廬于墓側齊永明中爲豫章王嶷主簿與彭城劉繪俱見禮接未嘗被呼名每呼爲劉四張五以貧求爲剡令畧不視事多爲小山之遊會山賊唐寓之作亂稷率厲

部民保全縣境所生母劉先假葬於琅邪黃山建武中改申葬禮賻助委積於時雖不拒絕事畢隨以還之自勿及長數十年中嘗設劉氏神座出告反面如事生焉歷給事中黃門侍郎新興永寧二郡太守郡犯私諱改永寧爲長寧永元末爲侍中宿衛宮城武帝師至兼衛尉江淹出奔稷兼衛尉卿副王瑩都督城內諸軍事時小督滂虛北徐州刺史王珍國就稷謀乃使直閣張齊弒于含德殿稷乃召右僕射王亮等列坐殿前西鐘議遣國子博士范雲中書舍人裴長穆等使石頭城

諸武帝帝以稷爲侍中左衛將軍遷大司馬左司馬梁  
朝建爲散騎常侍中書令及上即位封封江安縣子位須  
軍將軍武帝嘗於樂壽殿內宴稷醉後多怨辭形於色  
帝時亦酣謂曰卿兄殺郡守弟弑其君袖提帝首衣染  
天血如卿兄弟有何名稱稷曰臣乃無名稱至於陛下  
不得言無勲東昏暴虐義師亦來伐之豈在臣而已帝  
將其鬚曰張公可畏人中丞陸果彈稷云領軍張稷門  
無忠貞官必險達弑君害主業以爲常武帝留中竟不  
用累遷尚書左僕射帝將幸稷宅以盛夏留幸僕射省舊

臨幸供具皆酬太官饌直帝以稷清貧手詔不受守  
武帝經造張永至稷三世並降萬乘論者榮之稷雖居  
朝右每慙口實乃名其子伊字懷尹霍字希光峻字農  
人同字不見見字不同以旌其志旣懼且恨乃求出許  
之出爲青冀二州刺史不得志常閉閣讀佛經禁防寬  
弛僚吏頗致侵擾州人徐道角等夜襲州城乃害之有  
司奏削爵土稷性明烈善與人交歷官無畜積奉祿皆  
頒之親故家無餘財爲吳興太守下車存問遺老引其  
子孫置之右職政稱寬恕初去郡就僕射徵道由吳鄉



人候稷者蒲水陸稷單裝徑還都下人莫之識其率素如此長女楚媛適會稽孔氏無子歸至家逢稷見害以身蔽刃先父而卒稷與族兄充融卷俱知名時人見云充融卷稷爲四張卷字令遠少以和理著稱能清言位都官尚書天監初卒稷子崦爲侯景所害列在忠義傳褚翔字世舉河南陽翟人也曾祖淵齊太宰佐命功臣自有傳祖綦贈太常父向字景政年數歲父母相繼亡沒哀毀若成人親表異之及長淹雅有器量位長兼中向風儀端正眉目如畫每公庭就列爲衆所瞻

梁卒於北中郎廬陵王長史翔初爲國子生舉高第累遷宣城王主簿中大通五年武帝宴羣臣樂游苑別詔翔與王訓爲二十韻詩限三刻成翔於坐立奏帝異焉即日轉宣城王文學俄遷友特宣城王文學加正王二等翔超爲之時論美焉出爲義興太守翔在政潔已省繁苛去浮費百姓安之郡之西亭有古樹積年枯死翔至郡忽更生枝葉百姓咸以爲善政所感及秩滿吏民詣闕請之勅許焉尋徵爲吏部郎百姓無老少追送出境涕泣拜辭翔居小選公清不爲請屬易意號爲平

允遷侍中太清二年遷守吏部尚書侯景圍宮城翔於  
園內丁母憂以毀卒翔少有孝性為侍中時母疾篤請  
沙門祈福中夜忽見戶外有異光又聞空中彈指及曉  
疾遂愈或以翔精誠所致云翔族父球字仲寶宋散騎  
常侍裕之玄孫也祖曖太宰參軍父績太子舍人球少  
孤貧篤志好學有才思宋建平王景素元徽中誅滅唯  
有一女存故吏何昌寓王思遠聞球清立以此女妻之  
仕齊為溧陽令在縣清白資公奉而已仕梁歷都官尚  
書通直散騎常侍祕書監領著作司徒右長史常侍著

作如故自魏孫禮晉荀組以後台司加貂始自球也後  
為散騎常侍光祿大夫加給事中卒

宗夬字明揚南陽涅陽人也祖炳名列隱逸傳父繁西

中郎諡議參軍夬少勤學有局幹仕齊為驃騎行參軍

時竟陵王子良集學士於西邸並見圖畫夬亦預焉齊

鬱林之為南郡王居西州使夬管書記以筆札真正見

許故任焉時與魏和通勅夬與尚書殿中郎任昉同接

魏使皆時選也及文惠太子薨王為皇太孫夬仍管書

記太孫即位多失德夬頗自踈得為秣陵令遷尚書都

官郎少帝見誅舊寵多被其災唯夫與傳昭以清正免  
齊明帝以爲郢州中從事以父老去官南康王爲荊州  
刺史引爲別駕武帝起兵遷西中郎諮議時西土位望  
唯夫與同郡樂藹劉坦爲州人所推服故領軍蕭穎胄  
深相委仗武帝受禪歷太子右衛率五兵尚書參掌大  
選天監三年卒子曜卿

表曰字千里陳郡陽夏人也父顓宋雍州刺史顓附載  
其伯祖光祿大夫湛傳泰始初顓自雍州舉兵奉尋陽  
王子勳爲帝軍敗身死家滅昂藏於沙門沙門將以出

關關吏疑非常人沙門杖而語之遂免或云顓敗時昂年  
五歲乳媪攜抱匿于廬山州郡於野求之於乳媪匿所  
見一虎因去遂免會赦得出猶徙晉安在南唯以勤學  
爲事至元徽中聽還時年十五初顓敗傳首建鄴藏於武  
庫以漆題顓名以爲誌至是始還之昂號慟嘔血絕而  
復蘇以淚洗所題漆字皆滅人以爲孝感葬訖更制服  
廬于墓次從兄豕常撫視抑譬之昂容質脩偉冠絕人  
倫以父亡不以理終身不聽音樂後與豕同見從叔司  
徒祭祭謂豕曰昂幼孤而能至此故知名器自有所在

起家太子舍人爲王儉鎮軍府功曹史儉後爲丹楊尹  
於後堂獨引見昂儉指北堂謂昂曰卿必居此累遷黃  
門郎昂本名千里齊永明中武帝謂曰昂昂上車之駒  
在卿有之令改卿名爲昂即字千里後爲衛軍武陵三  
長史丁母憂哀毀過禮服未替而從兄彖卒昂幼孤爲  
彖所養昂尺制替服人有怪而問之昂致書喻之曰昔  
馬稜與從弟毅同居毅亡稜爲心服三年雖禮無明據  
而事有先例由是人始服之後爲御史中丞時尚書  
王晏弟詡爲廣州多納贓貨昂依事奏劾不憚權要

當時號爲正直初昂爲太子洗馬齊明帝爲領軍昂  
風素頻降駕焉及踐阼奏事多留與語謂曰我昔以卿  
有美名親經相詣昂答曰陛下在田之日遂蒙三顧草  
廬帝甚悅尋遷豫章內史丁所生母憂去職以喪還江  
路風潮暴駭昂乃縛衣著柩誓同沉溺及風止餘船皆  
溺唯昂舡獲全咸謂精誠所致葬訖起爲吳興太守齊  
永元末武帝兵起州郡守宰皆望風降款昂獨拒境不  
受命帝手書喻之使降昂不從建康平昂舉哀慟哭時  
帝使豫州刺史李元履巡撫東土勅元履曰袁昂道素

之門世有忠節天下須共容之勿以兵威陵辱元履至  
宣旨昂亦不請降開門徹備而已及至都帝亦不問其  
過天監二年以爲臨川王後軍參軍昂奉啓謝恩陳誠  
帝答曰朕遺射鈎卿無自外尋爲侍中遷吏部尚書固  
讓徙左民尚書帝謂曰齊明帝用卿爲黑頭尚書我用  
卿爲白頭尚書良以多媿對曰臣生四十七年于茲矣  
四十以前臣之自有七年以後陛下所養七歲尚書未  
爲晚達帝曰士固不妄有名十五年爲尚書左僕射尋  
爲尚書令時僕射徐勉勢傾天下在昂處宴賓主甚歡

勉求昂出內人傳孟昂良久不出勉苦求之昂乃復已  
命出五六人始至齋閣昂謂勉曰我無少年妾老嫗並  
是兒母非王妃母便是主大家今令問訊卿勉聞大驚  
求止方知昂爲貴昂在朝謇諤世號宗臣昭明太子薨  
立晉安王綱爲皇太子昂獨表言宜立昭明長息歡爲  
皇太孫雖不見用擅聲朝野自是告老乞骸骨不干時  
務昂雅有知人之鑒游處不雜入其門者號爲登龍門  
大通中位司空大同六年薨時年八十詔即日舉哀初  
昂臨終遺疏不受贈謚勅諸子不得言上行狀及立銘

誌凡有所須悉皆停省脫有贈官慎勿祇奉諸子累表  
陳奏詔不許贈本官賜東園祕器朝服錢帛謚曰穆正  
公有集二十卷初昂之歸梁有馬仙琕者亦以義烈著  
名仙琕字靈馥扶風郿人父伯鸞宋冠軍司馬仙琕少  
以果敢聞遭父喪毀瘠過禮負土成墳手植松柏起家  
郢州主簿累功為龍驤將軍南汝陰譙二郡太守齊明  
帝永明中魏將王肅侵邊仙琕力戰以寡克衆遷寧朔  
將軍豫州刺史武帝起兵四方響應帝使仙琕故人姚  
仲賓說之仙琕先為設酒乃斬於軍門以徇帝又遣其

族叔懷遠說之仙琕曰大義滅親又命斬之懷遠別江  
軍中為請乃免武帝至新林仙琕猶持兵於江西口抄  
糧運建康城陷仙琕舉哀號哭謂衆曰我受人任寄義  
不容降今衆寡不侔勢必屠戮公等雖無二心其如親  
老何我為忠臣君為孝子各盡其道不亦可乎於是悉  
遣城內兵出降餘留數十壯士閉門獨守俄而兵入圍  
之數十重仙琕令士皆持滿兵不敢近日晚乃投弓曰  
諸君但來見取我義不降乃檻送建康至石頭而脫之  
帝使待表昂至俱入曰使天下見二義士帝勞之曰射

通志列傳卷三十四  
四  
五  
鉤斬祛昔人所忌卿勿以戮使斷運苟自嫌絕也仙理  
謝曰小人如矢主犬後主飼之便復為用帝笑而美之  
俄而喪母帝知其貧給賻甚厚仙理號泣謂弟仲父曰  
蒙大造之恩未獲上報今復荷殊澤當與爾以心力自  
効耳天監四年王師北討仙理每戰勇冠三軍當其衝  
者莫不摧破與諸將論議口未嘗言功人問其故仙理  
曰大丈夫為時所知當進不求名退不逃罪乃平生願也  
何功可論為南義陽太守累破山蠻郡境清謐以功封  
滄涯縣伯遷司州刺史進號貞威將軍魏豫州人白早

